

四庫全書

集部

欽定四庫全書

集部

澹軒集卷一至三

詳校官庶吉士臣翁樹培

主事臣呂雲棟覆勘

滕錄貢生臣章松雲

滕錄貢生臣王駿

欽定四庫全書

集部四

提要

澹軒集八卷

別集類三 宋

臣等謹案澹軒集八卷宋李呂撰呂字濱老
一字東老邵武軍光澤人其行事不見于史
傳惟周必大平園續稿第三十五卷內有所
作呂墓誌一篇稱其端莊自重記誦過人年
四十即棄科舉至七十七而卒又稱其學務

躬行深惡口耳之習讀易六十四卦皆為義說尤留意資治通鑑論著數百篇蓋亦恬退力學之士矣朱子嘗為其父作墓誌今集中尚有上晦庵干墓誌又呂立社倉朱子為記歎其負經事綜物之才老而不遇呂歿後其子文子以集求序朱子語人曰李文之文可謂有補于世教未及為序而疾革見于文子所作跋語中今觀其詩文雖多近樸直少波

淵迴復之趣不能成家然明白坦易往往有
闕于勸戒不失為儒者之言朱子所稱實出
公論不盡以其子文子游於門下之故也焦
竑國史經籍志載澹軒集十五卷與周必大
墓誌相符世無傳本惟散見於永樂大典中謹
採掇裒綴釐為詩三卷詩餘一卷雜文四卷
周必大墓誌一首亦附之卷末以備考核焉
乾隆四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

澹軒集卷一

宋 李呂 撰

五言古詩

題君山愛松軒

青青窓外松高下如羽蓋不論霜雪晨屹立風雨外深
根養茯苓千歲坐可待世情苦炎涼一日幾變態此物
獨堅貞雅志在久耐清聲萬壑傳時奏壯生籟

陪晦翁遊玉澗

夜琴響空山臨流水方折老仙何處來欣賞共清絕不
知盧全家還有許風月

抱膝庵

青山不世情終日獨我顧修竹歲寒姿不受纖塵污開
窓寄數椽良以二者故出門欲求益適墮未識路屠酤
難與語餘子安足數豈無王侯家搖尾覲一遇自分踈
懶性初非俳優具由來勢利交朝且不保暮何如翳環
堵靜對古人語從渠不我與聊復吟梁甫

送高丞別

名衡夫
字平叔

君侯七閩英學問早有餘年時猶未冠鼓篋游上都文
成筆五色四海仰名譽調丞尉江邑有實不願圖竭來
對二松清襟映冰壺粹然眉睫間未變庠序儒胸中浩
然氣固已雄萬夫我窮卧洲渚江鷗以為徒屢枉高軒
過峩冠講唐虞馳騁文史樂時得陪卷舒瓜代遽及期
此情將焉如恥作兒女態揮洒沾衣裾虎溪豈限我足
劄方趨趨悵望不遠送搔首空躊躇所覲善行李早達

三山隅安居未容久快作朝省趨用賢世所急君才應
時需願補仲山袞再矢皋陶謨勿以得失慮行當翺天
衢愧乏折筮贈短篇見區區他時舊交念閣闔寄樵漁
乙巳四月比屋多疹痘瘡痢間作五月盡猶未
已病者延綿在寢治療不獲其法往往失生理
殊可憫痛乃作民病書事一首以紀之

去年秋冬交白晝雷虺虺隆冬忽暄燠青紅開百卉雨
澤不時下快雪傾復霽井泉傍射澗水通一遂春風

二月前行人汗流背倏來夏初中遽變素商氣稻穀已
三布時過未鍼水複衣日猶寒重衾夜增被變理失其
節老弱生疵癘疹痘無間然否則得痲痢十室聞九病
顏色非人類明晨溫風屆風候尚云爾祗愁淫雨歇炎
威火爭熾爍石更流金暴烈摧萬彙皇天本至仁長懷
好生意恢網踈不漏蓋高卑聽視夫誰執其柄悖謬乃
倒置感召厥有由下民亦何罪我欲借扶搖剖心叩玉
陛九關羣虎守未許凡骨詣願天回光鑿肅正天之紀

甲庚先後三寒暑無驟至春榮不妄施秋斂仍合義四
序蔑侵陵功成順常理三垣拱帝座百辟森列位星辰
各授職鈞播豈私遺巽風司號令罔或輕行止雷霆秉
鈇鉞殲必姦宄膏潤到焦枯陽和不擇地幅員幾萬
里一一防壅蔽日月黃道明泰階平如砥豐穰被率土
壽域包遐邇閭閻禮遜興鼠偷自不起吾皇免焦勞隣
敵望風靡聖世作幸民請從今日始

和許尉仙田舍野老有可憐之態壁間之什

乞糴民宵征出糴官夙駕艱食間填壑災星未退舍七
閩况多山厥田惟中下年登穀粟賤逐末貪白話一逢
歲不稔大半為饑者公私久匱乏誰歟可資藉哀哉南
畝農長年服耕稼傾困了租賦僅逃吏胥罵東作已無
糧貪賒寧論價負逋罄產償求售忘早夜逡巡生計盡
失所安足訝尉仙明達人出語補風化咄彼蕪并家斂
社當愧謝

喜入杉嶺

此行實附米綱船欲到南康謁晦庵
朱先生為先人求墓文未至而反故

然云

行盡山嶺頭歡喜入鄉關憶昨冒雨去寒澁亦多端自
登糧網船出入狗竇寬水漲泊無岸水落淺湊灘直待風
水順搖艣離江灣虺蜴微細物託龍逞神姦篙工精禱
罷頃刻過千山脫或小不契風波生坐間竄身輒拘滯
伍噲仍比頑疑慮狐涉水進退羊觸藩僅得黃羲叟可
與話歲寒論文消永日長歌當夜闌傳聞白水發川途
阻瀾漫余益動歸心掉首辭孳跼悵懷陶靖節不肯效

一官况為太倉鼠蠶食珠未安肩輿走泥塗僕夫愁險
艱附舟計已左且復行路難見幾恨不早興盡而知還
明朝得善達那假生羽翰稚子爭候門細君捲簾看真
樂未渠央茅簷共圍圍尚論數千歲窺管才一斑稍定
理殘編補綴令可觀尚友天下士博約加雕鑽遊談苦
無味素手空厚顏底事通神明至理吾豈慳設有無父
國而後不可干但患志匪堅作詩鏡肺肝

題吳微仲常齋

人心非無常自為外物禁喜怒烈火熾寵辱鈷鋒森從
茲失本然至理而浮沉達人解其會魔軍詎能侵盤石
可轉移明月猶晴陰卓然有所立此道古與今顏淵無
終食孟子不動心充君名齋志前修端可尋

題伯丈人黃待制歸來堂

君子重進退大節貴能全厥志在冥鴻耳非聞杜鵑縣
車示優寵揮金樂耆年高風激貪懦千載要齊肩

送吳晦叔赴廷試

我昔遊白鶴山川氣雄深邂逅識吾子憂然唳孤音日
日望飛鳴洄泐迺至今玉美出堅璞木老生喬林書生
未足道聊用慰苦心始駕百斛船掛帆發江潯破浪當
自茲意象殊駸駸天方拓王度清問虛宸襟調毫寫胸
臆氣力戈鋌森荷衣縛異時恐為寒蟬瘖江城惜此別
風雪作晝陰何以託遠懷酌酒拊劔鐔湖海氣搖薄激
烈愁端侵唯應白雲夢夜夜飛遙岑

勉諸子

孔子昔當危良以桓魋故韓信伏跨下將壇起徒步聖
賢昔未過未免失常度固知天地寬出門多齟齬貧賤
勢易陵動息要衡慮綈袍戀故人進食哀漂母小人不
及夕焉知鴻鵠舉桃花倚春風零落隨夜雨流螢曳殘
光未省羲和馭君子並松柏挺幹傲寒暑昭然揭日星
進與衆瞻睹羣兒勤修讀文行師邃古莫學小兒輩啾
啾燕雀語顏淵犯不校萬世共尊許孟子善養氣策功
不下禹潢潦無根源勿用遽歆慕吾言可書紳審思宜在

汝

遣興

生人無喜怒喜怒由外觸平地有風波安居多鳩毒緬
懷先哲士每用此理燭顏子不貳遷所樂一瓢足

題少室故居

拾遺舊隱居一畝長蓬蒿在昔考槃初擇勝得無勞羊
腸罕人迹丘壑方自豪鳳凰景星覩奔走紛兒曹屈伸
固相感舒卷隨所遭莫言從此去索價遽能高

近世飲者尊尚苦味有感成詩

悠悠古先酒麴蘖化為醴適口固匪他詩人詠其旨岐
黃作本草甘辛味所紀惟清香滑辣四事世云爾孟詵
注為苦自不燭厥理至今蔑公論遂以詵為是乖僻隨
耽嗜不爾遽遭詆氣稟炎上作無與諸膽比人情素弗
食嘗者為雪恥柳家集衆葯意在勗諸子未聞無其故
反以彼為美一呷三掉頭強嚙身聳起從來好歡伯可
畏非可喜孤負太和名翻作攪腸水因思俗顛倒類此

蓋多矣大路指為迂曲徑偏踐履鄭聲既可惡滿市更
盈耳憔悴間姬姜一猶雜蘭芷貪濁和者衆獨清競萋
菲善惡久相淆何特酒而已至當終難掩豈必隨風靡
革弊會有時周道本如砥

見諸公古風有感而和

吾慕巖子陵躬耕寄事外弗聽有道舉安得從郭泰恥
因粟五斗陶令腰束帶三賢甘寂寞舉世惜機會是心
本通明忍把客塵蓋洗耳潁陽水要使聞清籟紛紛難

與言簡篇猶可賴

適見諸公詠梅之什因用其韻率作者同賦

影落林塘凹斜入茅簷角月黑縞袂逢天寒翠袖薄世
無杜陵人清吟久零落詩魂不可招遠水誰當酌

復次韻二首

首出萬物表翠芳誰與角正色淡無邪天香清不薄舊
時對花飲寧恨霜月落老作花下僧淪茗當杯酌

元是第一花何用爭頭角桃李待春風妖嬈恣輕薄幽

人似歸鴻浩氣胸磊落感此歲寒枝悠然成獨酌

追挽游大夫

叔翰

大夫古君子不可今人求蠅營鄙世態貪吟口不休一朝膺事任卓爾茂勳猷此道今已遠天乎公首丘

戒蠅

我夙造惡業半生苦瘡癩蠅喙利如針秉箠倦揮滅彼蠅業更深曾不慕香潔乘間恣飛舞嗜此穢膿血我雖以慈受汝愧寧可雪狂念儻不悛善計有一說海上逐

臭夫正是汝儔埒速往從之游從容度歲月貪癡志願
足人害永除絕相汝下劣軀不過藉炎熱微偉豈可常
肅霜防凜冽

家有含笑花開因成三首

山花弄春妍紫霧巧映帶凝羞香乍吐顰蹙有餘態芍
藥畏陽艷愁紅爭斂黛幽姿小嫣然已復傾下蔡
正色巧遮歲天香清可帶若為忍一噓恥效嫖薄態奴
紅春事退絕意矜粉黛質素本任真藻稅鄙居蔡

花開晒羣芳葉密相映帶根移下岩谷本無塵俗態紫
萼半含羞翻嬾污香黛我欲譜此花法書今乏蔡

送江宰別

行李在門外駕言歸帝都三年宰杭州警敏材有餘檢
身不容玷清冰瑩玉壺遇事有所立風雨信不渝吐哺
出延容懸榻時待儒雅量不遺物狙詐嗤庸奴胸中水
鑑明黑白分兩途慈良恤民瘼嚴憚戢黠胥去夏忽大
饑米粒貴比珠農民既無蓄官廩素乏儲君以身任責

詢謀及樵蘇聲威聳鄰寇日贍幾萬夫一一勞措晝晨
飯常至晡惜哉當路者訪問亦已踈此功肩古人反與
泛泛俱要當公論定會有聞天衢我哀耕谷口屹然如
枯株他人不着眼屢辱顧草廬脫畧時輩禮待以國士
徒臨別難為懷欲贈將馬如但願益磨礪器宇恢遠圖貴
富皆分內青氈君豈無力疾出送別酸風生道隅征旆
不容駐搔首空躊躇

丙辰夏和周宰

愛公北堂幽背郭出塵外登臨攬萬象氣宇自怡泰目
寄孤歸鴻道存不下帶山水含清暉况復總其會隔岸
列喬松亭亭若車蓋雲過矯虬龍風來聽竽籟於此省
借留饑民斯有賴

讀太白集

吾宗老太白俊逸自幼年學成喜任俠長劍辭三川無
心馴鳥雀急義散金錢曳裾半天下所至驚四筵筆陣
掃強敵詩情快湧泉一朝見賀監薦鶚君王前金馬得

金史卷之三十一
卷一
供奉酒徒同醉眠從駕方連召扶頭得十篇奴視高力
士風期魯仲連青蠅工點玉錦袍棹迴船自謂天地臣
浪稱平地仙志大雖難揜身危幸保全江陵欲難作彭
澤見幾先仍喜宮詞句渾如諷諫篇至今讀青史終始
無間然

貞婦

婉彼鄒氏女其父嘗籍兵嫁作耕夫妻婦道以勤稱厥
夫惰農業居肆寄郊垆薪爨不時給貯粟未滿餅行年

三十餘臉白兩鬢青誰家馬上郎一見願目成留連不
忍去斜紅掛日鉦携籃夫偶出次第陳私情示以篋中金
持贈固不輕正色叱走之郎馬不及乘未幾老狂生襍
被問宿程百計稍與語酌酒欲同傾窓前理殘麻不顧
空丁寧復出綺香囊藉以五花繒擎來通鄭重雖受心
不平收之置敝篋生意正經營託言姑少待反把柴門
扃長聲呼四鄰悲切不忍聽逡巡夫亦歸繫縛訴縣庭
縣官頗嫉惡慰遣壯其能撫几三嘆息恨今無肉刑吾

聞秋胡妻死有不朽名又聞昔羅敷語直理甚明人生
各有偶勿用行兼并奈何世混濁強暴相侵陵鄒本微
賤人姆傳初不經何況抱貧苦守身屹長城後世迹其
事足媿古烈貞誰秉董狐筆大書播餘馨

胡程寺二首

上天一何慘盛夏忽霜飛竟奪慈母去焉用此身為空
餘白雲念無復彩戲時一恨一灑血何以報春暉

忽逢劬勞旦兒女拜我前低頭勿頌壽迺公實不天東

南西北去日月時序遷目斷烏江麓高墳鎖冥煙

右閩人李

某以辛巳四月二十六日投宿是寺至之明日偶值生朝不勝哀慕之情姑述數語非敢言詩也謹泣血書志

于壁

改過

顏子趣高遠改過不待形子路雖未及有聞思欲行庸人過莫知心目任盲騰縱復覺其然如醉不願醒幽顯孰可欺徒自蔽聰明直待形迹著巧飾漫經營辭屈既無益斂翼如凍蠅豫貴介于石安取冥豫成訟要免終

凶謀始那用爭，頤養知節慎，損疾在室懲，下交儻不瀆。
惡習難薰蒸，師誨當佩服，勝已求友朋，過言與過行，點
檢莫暫停，粗能遵此戒，無忝爾所生，海鷗識機深，良馬
認鞭聲，爾過勿憚改，豈知禽獸情，善惡審取舍，勿用苦
叮嚀。

泊雷公步涉豫章境，江流淼漫煙村夾，岸景色
橫出，顧挹不暇舟中，偶獲古風一首。

我昔閱畫圖，酷暑江天景，是行不作難，巨艦寄萍梗，施

樓一放目合付詩管領煙雨山出沒浦溆林逾靜水行
三四家蓑篷事畦町閑牛負烏鵲散牧無人境森森萬
頃波撇掠小漁艇南風吹霽月碧玉兼天淨清絕迺如
許獨恨句非警強作捧心顰語出輒肯縈共載多騷人
解頤埒匡鼎模寫入新詩敢憚再三請

贈上官法師

法官道家流修奉有年所靈驗感人多時賢贈詩句一
日來訪予三揖進賓廡函袖出異書雷文加釋注滌手

徧披閱因果皆有據紛紛秦漢後死者畧可觀權量巧
心計悖道忘君父貪淫蔑仁義往往涇斤斧質經吾聖
人有理無其故迨乎震夷伯隱慝才顯露嗟乎三代前
襟實猶近古後者業雖熾日甚造罪苦不然子之書何
迺遽有許自居田野間茲事聞亦屢又知今視昔已復
不勝數蠢彼無知輩徒誦孝悌語人貌犬彘心理頭入
穢污俯仰多厚顏劬勞忍深負目前恣為樂遑恤盈墨
簿願子持此書鏡石置通衢比屋得大誠毋致煩天誅

下愚終不移自取任從渠有能用斯言僊籍登不誣脫
或秘弗示與道終懸殊述此贈行色子其信否乎

題叢碧亭

主人厭塵俗不使居無竹詩翁愛詩史詠歌長不足釋
龍徧山園嘉名榜華屋何當乘逸興倚欄聽戛玉

聳玉亭

昔我隱居東有圃廢不入平生愛竹心要與共晨夕種
之三二年小笋生解解歷歲既云久盤根日以闢環植

數百挺大者欲盈尺直節勢昂霄瑩潤如玉立邇來苦
炎蒸小亭漫營葺東山舊蒲葵從此可揮擲為顧清陰
多更期廣封殖本固待時來春風易為力

遊青玉峽

雙劍插銀潢飛下作驚瀑奔流兩山間峽石峙青玉大
聲殷其雷餘響亂琴筑澄泓神龍居穢濁不敢觸派別
入危亭湍激如轉轆亭前石磴斜快瀉皴明穀我來濯
塵纓一覽駭心目霧罩香爐峯龜鶴舞見腹山尖應更

好恨不騎黃鵠老坡五字句斂衽三敬讀是翁父已僂
鯤鯨隨絕足猶有出塵語與世作軌躅援筆記姓名良
慚學貂續

答官仲儒

風俗去古遠人偽日敗常故知取士法時焉立紀綱設
科發自漢糊名始於唐前輩務實學倡道賴歐陽當世
所得盛登用多俊良倒指幾百年講求屢更張邇來取
進士輕快好文章唾手鏡雁塔轉身筮駕行莫論稽古

力所貴時學長自顧本迂拙下語愁肺腸雖云事場屋
浪逐槐花忙竟如卞和璧三獻足已傷既然違好尚敢
不知枯囊釀渚溪之泉可以供酒漿拾東園之果可以
資饌糧耦語古聖賢曝背傲羲黃義命要不媿胡為乎
皇皇故人弗予棄妙句深激昂清逸庾謝迫風騷屈宋
旁報言之瓊琚微吟頻寒螿

寄題余氏桂亭

主人開傑檻懶種洛中魏諸郎請嘉名笑指亭下桂根

分月暈寒花染天香細珍重青雲梯筥觥金未為貴

古意

鴟鴞嘲鳳凰飛鳴競啾啾鳳兮問彼鴟見憎何因由我
居在丹穴下瑞暫來遊梧桐與竹實食息無外求爾本
挾妖怪隱身向陰幽所至興禍事觜爪藏戈矛晝伏作
鼠態白日照可羞臭腐適其願惡類自與儔志尚素不
同何殊風馬牛嗟予月旦評豈論汝劣優汝道自取薄
安得妄怨尤自古盜憎主何異鴟革流有如夫子聖武

叔非宿仇臧倉沮孟氏豈為魯君謀但當礪風節汝自
曲如鈞

某伏蒙丈人僉判出示嘗與侍郎鄭公淺沙泉
唱壽詩軸率爾次韻

在昔紹聖初羣英萃朝紳道鄉鼓諫舌勁氣排天閣雷
霆固難犯鵷鷺皆喪神獨一黃右轄從容為奏陳主聖
臣則直攀檻古所聞龍顏為稍霽投荒貸斧斤公亦坐
此去剖符漫朱輪斯人下世久藹然播清芬表盜當漢

代引却慎夫人用舍雖異致萬世嫡庶分向使李勣輩
將順恨無門但謂此家事一言陷其君陸贄得罪唐不
測幾隕身陽城以死爭久之理頗伸不如漢汲黯同朝
有公孫約議尋即背巧辭間其臣於惟我聖宋涵養士
氣振世代有忠鯁漢唐何足云且如唐子方指摘椒房
親繼論燈籠錦將貶嶺外春君謨立殿坳開救蒙寬恩
宛陵風雅手長篇紀詠存嗟嗟此鄒黃袁陽畧同羣近
則唐與蔡輩出有弟昆赤心要無負肯受富貴吞鄙哉

金史卷一百一十一
卷一
賤丈夫肉食苟朝昏傾危不遑恤是非誰與論前史豈
不載開卷徒沾巾伏讀珠玉書飄飄若凌雲遐追古作
者寧讓聖俞文顧我亦何人濡毫來效顰二賢迹益顯
餘波激後塵

酬令裕見寄之什

伯才不鼓琴良為知音撤淵明琴無絃荆扉晝常閉吾
道傳滄洲初不待識別叔孫志諧俗禮樂用絲莖子陵
持正論阿諛腰領絕寧可負鑿方枉尺未應屑郊居本

寂寞况乃生計拙食指日益繁資用時告竭客至坐無
檀竊與鄭公埒天隨拾杞菊焉能饜舖餒平生所厚人
過門或電掣嘗聞貴易交一命已變節包苴既無魚
菽褐倦造謁濶遠故人書誰復訪哀菴有燄手可炙其如
火不熱聞酸蚋必聚其如醯不洩向來出肺肝生死語
虛設醇風恣澆漓仁義從蕩滅江湖足相忘何苦怨離
別黃君忘年友歲寒我輩列抗志忌詭隨講究亦可悅
高堂甘旨奉敢以貧故闕姑從敦學半俯首棲林樾近

卷一
枉寄贈篇用意尤清切似聞於易道琅誦口不輟顧慙
澤畔癯韋編老披閱未達言外意搔首漫詭詭三聖日
星垂墻仞靡容瞥動靜本自然發明賴前哲屈伸相感
觸至理甚昭晰泰反復于隍需順出自穴機緘默循環
勿用騰口說寒泉終可食但貴井常潔正乏雙南金報
稱愧滅裂見許惠然來諒不出良月莫學王子猷興盡

江天雪

七言古詩

題焦山寺

水輪依風負坤輿百川東流同灌輸
掖巾之陂莽吞受沃焦之山初不濡
雲根終古插江湖狂瀾滔天隨卷舒
空神迴颺避突兀海門排霄岌相扶
僧居蠓山迷向背佛宇蜃氣成吹噓
昔游玄冬崖壑枯洪濤濺雨吹裳裾
風來駕潮愁海若溟漲跋浪翻鯨魚
羽淵咸池相蕩潏月阿日窟漂方隅
此身浮漚一緣聚四大濕相瀰空虛
鍼鋒懸持妙善住蚊睫坐睨焦螟居
山中老禪眼於菟

香飯遣化分雕胡重淵垂涎舞蛟首方丈宴寢凝薰爐
夜寒黑月照濁水乞取壞衲摩尼珠

題宋德器致爽軒

將軍嘯咤風雷生一諾之寵千金輕仰頭看山默不應
此段王郎真絕人人言爽氣定何物面目儼然君不識
非氛非祲非烟雲可以意了難口說子猷拄笏人笑癡
先生作齋人愈疑但知談河不救渴豈信秀色能充饑
千峯橫青朝過雨折簡招歸入詩句儻有俗客來叩門

為道我眠卿且去

滄海行

滄海有船不可渡癡人求仙死不悟
兒郎斷乳能幾時
忍令萬里投蛟螭
兒牽母衣抱父泣
文書催行星火急
樓船一去更不歸
至今思家朝夜啼
人生不禁別離苦
但得生存猶一處
君不見咸陽百萬家
長城白骨埋泥沙

宿游伯均裕齋夜無蚊蚋熟寐達旦

處處如雷針在舌，
啞膚成羣難撲滅。
主人作官重膏血，
未勞揮拂蚊自絕。
荆棘不產茅山旁，
天台有菌皆可嘗。
期君守此化民術，
異類盡令回善良。

寄題張道士招真閣

君成道去何許，
寂寂空山號行府。
自從漢末人相值，
因循今莫覩。
淒涼古廟落崑隈，
水遶閒庭縈嫩苔。
勅令立觀奉香火，
屈指三十年中來。
道士張君見竒古，
精力強明奈寒暑。
從前觀心力勤苦，
經畫一新舊堂廡。
嘗聞仙

者好樓居傑閣翬飛接雲衢往來世外隱君子萬一鶴
馭停須臾我勸張君更磨練莫遣光陰隨物轉一朝平
步玉皇前何慮羣仙不相面多少紛紛塵世人夢中說
夢元非真妙處工夫如會了千百世界現全身

寄贈天台石橋京行人

無心曾看石橋雲有耳曾聽石橋水俗塵未盡難重留
飯麻纔竟歸心起自從一別五春風夢繞橋庵西復東
雀噪亭前聽茶鼓蛇蟠砌外護瓜叢更憶依人兩烏鵲

朝朝飛下映真閣樹鶯土菌恣登盤林麓素無虫獸惡
江湖迢遞皆畏途誰知世上有華胥五百開士去雖久
猶餘一老能清癯幾年脅背不着席棟宇增新間金碧
風月忽寄盈尺書約我重來共晨夕恨不速駕鶴鷗皮
屈伸臂項欵山扉相逢定作解垢衣水邊石上同茹芝

送趙彥修

六月紅塵如火烈朝來一雨炎威歇漸看蘋末起涼颼
推上冰輪作清絕王孫叱馭欲何之直向銓曹射佳闕

天生良才必有用豈應付與噲等埒
幾載低頭丐祠祿歲寒頗獲固窮節
儻逢佳士重薦論平視朝紳可頑頓
顧我幽居苦羞縮却掃柴門學藏拙
每向水邊狎鷗鳥未遑郊外習綿蕪
君能脫略時從遊嘗鼎一臠端可別
臨行尚作半日留滿泛青甕話離別
秋風若遇南飛鴻好寄一聲慰騷屑

承德功仙尉出示直翁感興之作輒次其韻

蠅頭蝸角使人愁貪先務勝如爭舟
隱心空逐市朝樂

着眼未省林泉幽塵埃平時正汨沒出處與世相沉浮
由徑反誚澹臺子拔葵仍笑公儀休懷哉古道久寂
寞鳳鳥不至三千秋孰知名教真樂地徒以得失為
已憂騎馬四馳失其馭放豚一去何當求羨君淵源得
所自結交道義相追遊箇中有路儻深造直與古人為
輩流

賀吳守被召

壽翁

吳公骨秀如天人胸襟落落皆經綸少年固已富家學

筮仕聊稱梅子真挽弓馳馬特餘事智勇未減飛將軍
向者長汀初擁節寇攘聚集驚鄉村誰知撫定有長策
不戮一夫令自新稚耄謹呼弛兵革至今妥貼無叛民
移帥贛川尤鎮靜宿姦褫魄骨崩奔往年羣盜號淵藪
一旦荒壟安鋤耘錢流地上非橫索鈴齋坐獻生陽春
踐更盤錯威望著素秉公庶政有神貪吏望風爭解去
寃民在處皆獲伸還家坐席曾未煖迅召連催已在門
或人未免巧求譽我公特立天下聞厥今器識兼文武

倒指誰歟當此舉江淮百萬屯邊兵轉輸饋餉傾吳楚
中原荆棘今幾年師老不試漫貌虎陛下翻然采輿論
天意可見公宜處裴度指日平蔡州充國先零豈難取
唾手燕雲會有時佇看大將建旗鼓功異域鄙班超
歸佐熙朝作申甫

送黃仲甄赴廷試

我昔嘗為東南行煩君載酒送城闕酒闌上馬意惻愴
似歎飛沉異鱗鬪我言君豈噲等伍霜蹄偶蹶未為失

整銜易轡便千里寧比駕駘才寸尺轉頭日月曾幾何
君已聲名滿蟾窟笑呼扁舟下吳會去意猛作秋鷹掣
君家藝德知何年弟兄頭角俱突兀仙枝萬丈不供折
人家生子嘆豚犢春歸洲渚波面肥江神為君好風日
君王正御紫宸朝蜀士半居青瑣闥牽聯即日九天上
判司卑凡等廝役向來於我作魚羨吾今洗眼看鵬擊
人生行止特未定過坎乘流聽造物唯有名節不可汙
與君相期保黃髮

和韓義仲主簿古巖韻

君不見版築當年胥靡徒貌象忽與帝夢符卧龍抱膝
吟梁甫霸主不憚三顧廬又不見形模苦遭婦女笑袖
手不解世俗書碧山幽棲載典籍銀魚焚棄甘林居出
處雖云蘭菊異道則一貫無二途要之窮通有定分所
學豈以世俗拘一旦風雲合際會坐令四海如唐虞不
用山林並容爾胸中經濟常自如世間餘子真碌碌得
失交病言嘒嘒生前雅志一飽足趨時媼媚忘遠圖夫

君承平相家子典刑自與今人殊青春已負老成器白日兀坐聖賢俱腹笥兼收線五色準擬補袞膺時須豹變要是有毛質鵬飛九萬看搏扶古巖風月鎮長好請著斯名鏡座隅

登賦堂

為樊
守作

紫雲之山幾千丈勢壓岷峩欲爭長茫茫巨浸擘山開萬穴魚龍寄深廣眼明遙見使君家華堂夜魄栖簷牙手釣峽流揖峯翠裾珮縹緲凌雲霞仲宣登樓炫能賦

字字悲啼嘆飄寓他人有心予忖之魏奪劉傾渠不顧
使君胸著萬卷書向來遊戲從魚符拂衣歸卧喚不出
但有憂國心鬱紆日落未落飛鳥滅却立闌干思橫發
一川樵牧歌太平萬古關河感亡國麗詞落紙煥黼裳
細研物變窮天藏憑誰薦之九天上我無羽翮不得將
公乎豈又榛棘下狗監猶能援司馬子虛大人何足云
願賦蒸民追大雅

次韻令裕言詩

寓形宇宙有感發無一不可供詩眸風花浩蕩百變態
草木榮悴皆窮搜渾成功括造化窟未辭斧鑿孰為優
要當險易隨地出或平或激如水流不才正自困譏罵
白壁為贈非所求自憐不具正法眼解頤安足論賡酬

自臨州還題杉嶺舖

自西徂東三百里還闖入浙半月期人生奔走遽如許
世路險夷當自知造化密移真戲爾富貴時來則為之
盱盱睢睢亦何益磊磊落落真大奇

欽定四庫全書

澹軒集卷二

宋 李呂 撰

五言律詩

送仲秉赴廷試五首

亂石搜琮璧修梧待鳳凰地靈真間濶世眼但尋常我
友更誰子平生唯此郎連城不當價容易莫商量

霧豹文章異淵鯨爪角雄荒陂寒泣露空谷暮號風突
起能無意平沉未分窮不知貂冕地冷硯破窓中

欲獻琅玕腹君詩有宿盟雲天宸極邃日月袞衣明太
守薦何武諸公傾賈生三山移步到寄語問玄卿

一元誰破碎河洛漏微芬星斗昭乾緯葩華祭地文班
揚渾細事伊傅有殊勲補履非神劍相期敬所聞

元龍湖海士可但着茅廬詩老經從地禹功疏鑿餘蜀
峰帆影隔郢樹鳥行疎太史行天下歸來好著書

挽昭懷皇后詩二首

恍御還龜洛禕衣閔鮒隅光華隨渭水巡狩隔蒼梧已

卜先朝祔旋聞反寢虞昭懷千載諡不朽在椒塗

愍冊哀榮絕鮮原卜兆安世家金穴舊大隧玉衣寒何
意簪花柰空遺刈畹蘭神游秦陵廟永護月衣冠

次涪陵游北巖寺伊川謫居嘗傳易於此有鉤
深堂魯直名且書之故寺有四賢像伊川魯直

康節尹和靖

隔江定佳處放艇得幽尋直上雲根徑盡行霜葉林昔
人非避世此地可鉤深何物能熏染幽禽亦好音

癸丑季春上洲頽岸出敗冢冢中有塼云元嘉
二十二年七月二十六日余功曹冢後世子孫
長興富貴宜賒因題數句

八百年前窆功曹身姓余元嘉兩行字敗甃八分書富
貴念猶在子孫今已無癡人不修省視此意何如

丁巳三月送周宰行

中郎宜有後餘慶在孫枝學術堪時用公卿半已知五
行人鮮儷四字格尤奇自此官清要毋忘老布衣

予一病七十日心事牢落作詩自解

抱病懶巾櫛自度作黃冠披褐襟便短拖鞋步稍安忘
機任俗薄遮眼把書看未必不為福善乎能自寬

多病

守靜偏多病爭先素不能材非經世具分合出家僧利
路防深窵窮居任曲肱息交休擾擾藏拙要僂僂

遊希夷觀

觀李阿仙人修道處

祕館白雲邊來遊記昔年黃冠姿槁甚敗屋意蕭然訪

古知僂喬看碑識漢鑄危欄聊徙倚風袂欲翩翩
楓老丹成葉蘆輕雪作花晚風何處笛疎柳欲栖鴉絕
壁生虛靄晴天點片霞莫教殘酒醒客裏易思家

遣興

天淨鳥飛遠路幽花自香春風吹草木野水滿池塘事
去青山在人間白日長興來搔白髮微意久難忘

懷黃令裕二首

小齋開卷罷尚友憶黃君語孟能精熟圖書正討論梅

黃風送雨江漲野連雲何日相尋去書燈共一尊

今時求此道篤志孰如君經訓多成誦疑難喜細論利
交甘若醴世態薄於雲須秉歲寒節深推孔孟尊

有感

入務市朝念在家雲水僧善薰妻法喜敬遠女摩登忙
裏且尋靜熱中須放生時時發深省結業莫教增

觀荷

適當寒沼上更在月明中露重鮫珠濕天高奩鏡空參

差千蓋綠淡竚數枝紅華髮秋風裏持盃屬老翁

對竹次韻

舉世稱三友無心是此君
美花何足竝俗客未應論
不忍踈添月須教勁拂雲
晚涼欣對罷借色入清尊

挽上官文季直二首

踪跡半天下聲名落士林
搢紳爭汲引歲月漫侵尋
後輩尊時尚斯人竟陸沉
只言餘慶在子舍日駸駸

念昔康強際頻趨几杖前
交遊推上行禮遇辱忘年
木

落雞籠坂風酸薤露篇空餘兩行淚飄洒對新阡

晚步

薄晚憇高林好風吹我襟斜紅翻鷺翅空碧湛波心雲
塢牛羊下煙汀竹篠深一聲漁笛罷裊裊送餘音

代懷祖上舅氏

天上玉麒麟橫秋爽氣新書癡心篤好綵戲日長春直
去攀丹桂須為近紫宸外家多慶事接武有名人

五言長律

絕塵軒

昔年陪仲父杖屨集幽軒門占蹄輪道交無市井言池
邊對棊酒曾次有丘園蟬蛻寒雲斷徑荒春草蕃增新
窻戶改尚喜典刑存結客登臨去茶瓜勿憚煩

七言律詩

歸自南康寄懷朱使君

過盡重湖復過山陰凝忽變雪花團路迷曲折易成遠
風助橫斜巧送寒憶昨片帆離渡口特煩千騎駐江干

如今想在芙蓉觀獨據胡床爛漫看

弔霍光

官安胥飲貴仍驕父子同誅肆孝昭博陸時方專國柄
濟陰早已被弓弔老妻安得謀靈嫗劣女剛將冠內貂
白去副封竒禍作後車傾覆更蕭條

七夕次韻

天上佳期歲一來人間急管莫相催鵲橋成後天孫度
雨泣懸知颺馭回兒女歡呼爭乞巧樓臺羅列賸傳杯

欲搜好句陪年少病士慙無工部才

送雙峰聖僧遺像還山

枯木形模酷肖之祇應鐸落自秦時定光爐韜收親子
圓覺門風出自枝韜晦無因觀大用感通猶得見全提
要知取次為霖去便是元初利物機

天章閣成應制次韻

寶構雲屯珍木才璇題金榜倚天開高連色界非非境
光動星躔兩兩台上帝圖書開玉府從臣冠佩繼麟臺

詔音亦許賡宸唱榮勝鄒枚後乘陪

自題安樂行

老於世事盡忘機古廟寒灰閱四時稟賦舊為天地貴
遮闌那許鬼神窺無絃綠綺陶彭澤露地白牛僧大瀉
只此瞿曇安樂行從何處覓是非

絕塵軒

生平雅不樂城市背郭開軒喜再來煙淡山屏青未了
晴曛荷蓋翠相挨倚風柔弱休栽柳照水橫斜剝種梅

乘興祇應清坐好此懷難向俗人開

送許尉子雲二首

秦望排空插鑑湖先生氣稟舊東吳胸中今古幾千載
筆下波瀾雄萬夫綵棒垂門姦自肅土神應夢昔何殊
榮歸快作朝天計臺閣歡傳得巨儒

濟人曾現斬蛟手慢學吳門作陸仙雪月精神資句法
經綸器識得天全評君合在羲皇上許我難堪叔度賢
出處相懸同臭味寄懷猶望捧來篇

送陳尉別二首

名次公
字子容

奕世雄題鴈塔名于今父子自師生詞場魚貫真無敵
慶事蟬聯盡有聲雅興莫追吳市隱橫飛端繼紫微明

陸中丞作尉日一夕
土地神現夢有云從來患盜驚鄰里且喜三年鼓不

鳴

試吏誰云百寮底長材元是萬夫雄錐刀壑斷馬能較
涇渭區分獨至公顧我每慚天下拙辱君見許古人風
明年還憶蓬蒿徑身在瀛洲雨露中

天台石橋設茶供

聞說天台髻未髻中年方遂此煎茶不行四十九盤嶺
那見二千餘盞花架壑橫空瘦龍脊崩雲裂石怒雷車
他時乞我三椽地莫效曇猷滴兩窪

師正堂二首

物我雖殊理本同算來身教易為功表端豈但日間影
德盛應如草上風作字心君生筆下照人眸子驗胸中
平生得力今拈出尤見操存合至公

頽垣荒蔓幾經霜今喜崇成背郭堂雅欲援琴追宓子
時從退食詠羔羊溪流碧遠如平篆山木陰連不斷行
祇恐詔公臺省去空教南國愛甘棠

投贈錢侍郎端禮三篇

人間富貴豈須論三百年來積慶門名紀太常高大父
氣鍾仁祖外曾孫心存忠孝源流遠義薄雲天色笑溫
屈指前時功德輩悠悠誰似典型存

仙風道骨本飄飄萬卷詩書樂一瓢落筆雲烟盤錦繡

滿腔星斗絕塵囂懸知可使邦風美豈但能令國計饒
四海徯公歸致主方今天子舜承堯

天地生成無用軀青箱世業一愚儒幾同海上屠龍術
空守巖前待兔株自信平生非木石誰憐半世混泥塗
幸逢點鐵為金手乞與投身造化爐

上元漫興

天上元宵放月明張燈何苦浪經營一毡積日方呈巧
千片輕綃僅湊成里巷禽呼傾坐去街衢蟻聚側身行

誰人能向循良道，何不留心勸耦耕。

上元應制次韻

華燈不夜照青春，鼇背繒山迥絕塵。
已遣燭龍啣火炬，更開璧月駐鸞輪。
長疑化國烟霄近，未覺壺天晚日賓。
知是奎文臨海外，賜章今夕寵光頻。

遣興

丈夫各自有立志，或出或處非一途。
主父直須食五鼎，淵明元祇愛吾廬。
佚居自大同蛙井，巧進貪前乃盜窬。

顧我蹉跎未忘學肯將身世較盈虛

病中遣興

多難從來氣不舒老而多病背癢如足瘍所賴非心害
目昏猶欣見舊書白晝欲眠神思倦青春閒度物情疎
生涯淡薄隨時過他足他非莫問渠

詩勉粹夫進學兼示諸子

閒憶當年闕孔門未能無意覺斯民浮名浮利雖關命
多病多愁故惱人九十春光渾易老二三子者莫因循

老夫耄矣誠堪笑何惜同來試問津

吉祥寺舊名永壽初李昇為徐溫養子徐知訓
不能容置酒欲殺之行酒吏刁彥能以手爪昇
悟而逃伏此寺山谷作記無咎書

招提一徑入垂楊翠竹千竿粉籜香正要銀絲好看容
不須雪乳苦搜腸興亡徐李一彈指文字晁黃兩擅場
八十老僧無箇事猶將經卷佞空王

感興

聚滅元同水上漚癡人貪着不知休生便當路栽荆棘
死代羣雛作馬牛上灑計全謀蜀道長城功半廢沙丘
古來大手猶如此只合將心向內求

見菊

病夫省睡起凌晨遲菊朦朧破萼新雨細正應添潤澤
煙輕尤覺長精神近來霜重傷禾死幾見民憂灑涕頻
却是東籬賸黃菊不堪易粟當金銀

庚戌仲春携小子訪別晦翁過親友江清卿之

門其嗣子尚幼不果見次早道經江清卿墓下
悵然有懷

肩輿兀兀度山村細雨淒風日易昏問店舊曾來托宿
支頤今覺頓銷魂故人委蛻荒春草倦客空懷合暮雲
古木陰連藏小隱招呼無復笑迎門

次黃象之韻

踈山元是讀書山

碑云逸士何
仙舟讀書處

相望麻姑舊醮壇梵刹

雄誇今日勝隱居誰作故人看閒隨米運川涂迥喜入林

亭境界寬我已經營謝公屐竚君好去九遷官

借用鄧彥高韻

性學絲毫未易通醇疵何敢議軻雄文章事業須年少
朴鈍情懷屬老翁閒把笑談窮物外漫哀今古着胸中
觸來方寸有餘地喜到小齋緣素風

憂旱

田圃如燔木葉黃火輪從早出扶桑佇觀罪已侔湯德
更願求言舉漢章寃死豈能無孝婦當烹應復有宏羊

可憐野老吞聲哭此意何由達上蒼

送王晉卿赴廷試

恠底先生思湧泉少年筆勢已翩翩
馬嘶長道空驪首龍擘滄波竟上天
分付風雲身九萬更看禮樂字三千
期君未可班行去細聽臚音黼座前

送黃元董赴廷試

江夏無雙最擅名君家羣從總能文
丹枝只為一門種黃卷仍收再世勲
天上鴛鴻方接武眼前鴛塞漫成羣

蜀軍自昔鋒尤選一戰憑君靜楚氛

送郭順之赴廷試

半生鐵硯不償勞攬鏡驚心已二毛
縛虎正須還老手插貂未肯付兒曹
九天日月披晨翳三峽魚龍息夜濤
聞說西湖冠天下水光山色動揮毫

送楊文赴廷試

只今冠蓋盛諸楊連歲科名屬雁行
筆下戈矛吾退舍胷中珠琲海傾
歲雞羣有鶴人誰識熊掌兼魚子厭嘗

一振斯文千古事憑君更為引天潢

送楊道父赴廷試

每念先游嘗慨嘆於君先世最周旋
神駒墮地真千里老木蟠空已百年
此去漢庭應籍甚向來蜀產又蕭然
錦衣歸日烘晴晝應與萊衣巧鬪鮮

送趙勝仲赴廷試

過眼紛紛亂驕驕誰知龍種不尋常
更生學苦藜分照長吉詩多錦作囊
已作怒鵬橫絕漢更隨鳴鳳集高崗

天將一第酬寒士分付宗枝亦有光

贈畫師郭叔詹

蚤覺儒冠多誤身聊工傳寫養偏親丹青遊戲臻能事
造化生成羨逼真筆下豈皆行路輩眼中誰是築岩人
會當詔作雲臺像畫手惟君妙入神

喜雪應制次韻

嘉平瑞雪映蒼華寒凍河源萬里沙貝闕珠宮眩雲海
瓊林玉樹散空花先春知為農祥應澤物深隨德意遐

不隔寵光迴寸草何妨梅柳自萌芽

追挽劉平父二首

奕世旂常記姓名屏山道學藹餘馨
流風與世為標的好義於君見典型
琴韻祇求追古意吟懷偏喜旁林局
相逢恨晚情猶厚悵望音容隔杳冥

高才入用合求聞却向丘園號隱君
馳騁古人真我事泥塗軒冕付時人
黃梁未熟驚塵世白壁空埋慘暮雲
賴得相門餘慶在諸郎峙玉正詵詵

登一覽亭有懷亡弟成老下世

半年懶向此經行上已重來雨乍晴
三徑就荒春草合一亭依舊暮山橫
悵懷丘壑空陳迹極目園林不勝情
老境何堪風斷鴈倚欄揮淚咽溪聲

代人次韻

當時選勝入經營杖履寧論陰與晴
丘壑只應胸次有溪山故着面前橫
可憐永隔笑談樂何況從來兄弟情
峴首人登休墮淚攬林風雨作秋聲

宣和殿新竹應制次韻

千竿倏忽散層雲疑有風雷為駿奔峻擢已應煩地媪
巧裁仍復借天孫已驚虎豹留皮處更看龍蛇起陸痕

一云晴飈瑟瑟吹筠
綠瑞露深深染瘳痕

聖主工夫同造物坐令溫詔發霜

根

題游少張逸老軒

勞生著意在榮觀炊熟黃梁萬慮寬溢目琴書聊自樂
半窓風月不吾慳從誰更覓安心法回首幾經行路難

料想已能同水鏡任他胷次九疑山

代人挽妻父號道者

里閨推高足善良不才何幸玷東牀修容方喜超賓館
奠雁翻成舉酌觴晚鐸飄聲空有恨酸風吹淚不成行
諸郎頭角多餘慶褒贈行看為顯揚

癸丑七月十九日以老病分任諸子以家務因
為詩以示戒

子舍分勞非獲已息肩養疾樂閒居家傳道義頻加意

俗愛便宜莫計渠要是人人躬孝悌更令世世飽詩書
從今光大成吾志可免時稱賤丈夫

欽定四庫全書

澹軒集卷三

宋 李呂 撰

五言絕句

復齋學者

孟氏求放心義易戒迷復可嘆聲利場紛紛競馳逐

潭溪釣者

踞坐魚磯上無心同狎鷗敲針漫勞力故爾投直鉤

卧雲樵者

山深成獨往，伐木聲丁丁。莫作爛柯客，長年玩一枰。

老圃拙者

春蔬含綠滋，荒畦自鋤芟。萬事付一默，維摩許同參。

雲莊耕者

莘野樂堯舜，谷口豈其鄉。自是不可掩區區，非近名。

題七者寮

為劉平父作

瑩心冽寒泉，砥節介如石。本無市朝念，自與紅塵隔。

題東寮

羲和鞭日馭發軔自暘谷道人耕寸田開窻納餘燠

止宿寮

所重一言契寧懸千里期他年風雨夜還意劇談詩

山臺

蠟屐恣幽尋未能得其要登臨一放目千峯供俎豆

寓齋

萍梗天地間初不異萬物可能發深省惟有一事實

觀善齋

羣居有深益相視無餘事此道存諸中瞭然見眸子

和邑宰張元若酌月亭詩四首

亭乃大寺寨
廻檢廨舍

太白邀月飲祇許老坡會汗漫赤壁遊浩歌邈相對
周郎佳少年定霸在一戰勉哉志士心分陰疾如電
古人有大志聞鷄非惡聲信知酌月意與此同條生
明府命世才字量特閎遠為名江上亭拈出句中眼

橘香亭二首

滿林飽風霜千奴列亭下未許吳姬手藉此長聲價

花落飄碎瓊果熟染黃蠟張君鼻觀間莫著蘭麝雜

鐵笛亭

孤吹人已遠橫笛處猶在清名欣有託奔雲放天籟

井泉

山溜碧泓澄清甘歸色味儻逢張又新應不落第二

禪友

寄語同參人切忌隨他轉若向句中尋相逢不識面

碁友

間尋十九路坐斷千萬心運甍何為者當知惜寸陰

琴友

金玉聲清圓鸞鳳勢翔舞重是古人風勿效兒女語

文友

摘辭氣為主盛氣理或差大音等韶濩小巧同春葩

題君山觀招真閣六首

蠟屐發興屢幾為春泥阻此行不作難霽色隨步武
數峯碧嶺屹烏君成道山仙遊杳難問空鎖白雲閒

雙蔓正排空云是玉真府採芝何許入忽此駕修羽
觀宇藏山崦昔居火宅僧因緣有時節羽服奉香燈
暈飛新樓臺像設舊金碧焚修人已老倚杖對山石
彩侍過丘林星行忽一周春暉今已矣涕淚不能收

巢雲

幽棲寄山隈欣賞亦何有時許巢白雲紛然入窻牖

上黃端明壽詩以竚期三入後一品見玄孫為

韻

英聲久飛揚寰海共傾竚學者仰泰山蒼生待霖雨
器識誰能及功名自有期一朝聞正論親切在彤墀
獻替先其大從容接每三但知言謇謇肯顧府潭潭
仗節朔庭回建議光明入盡得強敵情何人敢輕襲
僕升時許同孟馬寧處後人特誦謙光我獨知德厚
姓字本無雙山林今見一動必合禮經心焉在王室
溫旨再褒榮王人就咨諗早晚詔公歸餘波潤羣品
骨秀類天人神清若巖電壽與山嶽齊造物茲可見

賤子甘藏拙無心學草玄自然多坎壈不是樂盤旋
阻陪稱壽席想見醉芳樽嘉慶宜圖畫簪紳徧子孫

瑩心泉

修綆何妨汲羸瓶不自任從渠清徹底伴我歲寒心

漁艇

撇烈非為魚流行本處山白鷗正得意相逐過前灣

自警三首

愛之能勿勞忠焉能勿誨彼有不受者善意翻成累

當仁貴不讓見義忌無勇今人無魏顆勿望渠形夢
嬖人排孟子通國誚匡章內省倘不疚青蠅徒自忙

椿迎

栽培護靈根夾道若車蓋坐待八千歲儼立風雨外

題破石鋪

往返數百里上下幾重山僕僕利名客不知行路難

茶竈

中坻出盤陀曲突非刻畫仙翁碾玉塵盈甌試春色

溫泉

陰陽分二氣，鈞播立萬物。泉脉或寒溫，初非擇地出。
太樸一已散，人偽日滋彰。持彼炎涼態，指目為溫湯。
匡廬發源初，絕景迺如許。尤幸遠市朝，不遭豪右取。
懷哉經始心，與世共遊賞。為語往來人，莫起驪山想。
題吳仲微常齋

達石情志倦，移山志必通。朝朝勤甃運，井井策新功。

七言絕句

和吳微明踈影橫斜水清淺七詠韻

深叢茉莉香有餘穠李爭春俗不除借箸推排風味勝
尖新莫向小梅踈

避俗淵明心會景祇詠孤松秀冬嶺爭識槎牙竹外枝
月上空塔間金影

倚竹風神不勝情裁雲刻月闌輕明澄鮮祇合騷人惜
懶對紅塵肉眼橫

嶺上休將貝闕誇江頭聊比玉川家箇中真趣誰能會

獨對回風雲陣斜

碧澗潺潺暮山紫
閉關危坐心如水
窻間微見一枝橫
鼻觀得香尤可喜

勝賞須傾竹葉青
此花元自聖之清
翻思杜老尤耽翫
野水橫吹當酒行

斜入茅簷如有恨
高情每賴吟題遣
要知調鼎會有時
且占寒溪照清淺

秋旱

天公作意雨垂垂
風伯顛狂散萬絲
執法若能誅首惡
更將京觀築鯨鯢

伏承伯丈人待制侍郎九重渙號三聘鼎來促
裝戒道即膺爰立謹吟成送行詩五絕句繕寫
拜呈

漢庭得謝久縣車
松竹蕭疎護葺廬
爭奈蒼生待霖雨
未容安石愛幽居

嘉謨豈但國著龜
舊學端為帝者師
聖世欲收仁義效

行看平步鳳凰池

公有是夢

孟子正心邪說息
昌黎首唱六經明
可憐後學多趨末
重振斯文藉主盟

撫撫周原二百州
欲圖恢復豈難求
既煩元老為時出
但願宣王益內修

梅花映雪送征鞍
要伴先生耐歲寒
收拾好歸調鼎用
春來枝上已含酸

送千二十姪五首

江頭片片玉梅飛
嶺路迢迢雪正迷
乘興為誰騎馬去
不辭迎凍散雙蹄

賢哉東道世崇儒
愛子尤專擇楷模
責望要須精舉業
未應道義略唐虞

紛紛世態利為言
此道誰人識正傳
為己為人宜兩盡
莫教渠笑舍其田

江左風流久擅名
成章擲地作金聲
清新俊逸俱難及
若比前賢更老成

却喜君知取友端
詩情遊戲志睇顏
更煩為說開三迓
安得斯人數往還

和感懷韻

四時迭運春復冬
莫把窮愁感兩峰
牢掣鼻繩休放却
鏡中已失舊時容

象之晚坐有感次韻

丈夫不作宋玉悲
珍重陶潛菊一枝
寄傲北窻緣底事
只應真趣少人知

題長灘鋪

一丘一壑吾臭味真是真非孰有無月笛煙蓑秋正好
急須歸釣渚溪魚

千四一姪見贈筇竹杖以詩謝之

常瞻南極畫圖中壽相偏宜九節筇珍重阿戎來寄我
慚無林下老仙風

澹軒

窮耽世味不期驕安得美牆暫見堯未到聞韶飽三月

且求陋巷樂簞瓢

代人上建守四首

潛藩雄鎮七閩頭
親覩賢侯利澤周
不借寇恂留穎尾
却教郭伋再并州

可怪鄉風最不情
生兒不舉世相仍
自從節省歸新厯
添得王民幾萬丁

鄂渚纔來便救焚
富沙拯溺濟飢民
從容妙得調元手
好轉洪鈞拱帝宸

悵懷往事我何知作興重來觸緒非無地可畦家十口
蕭然相對欲誰歸

題君山愛松軒

嘗愛山間老喬松棲煙宿雨盤虬龍道人所愛偶相似
許我來此聽松風

辨義豐老人師傅聞疑大乾事迹

義寧欲未隋鼎遷解符西泝心悠然沉舟甘作夷齊鬼
不與宇文同戴天

游鉛山石井

碧玉罇中仙洞府，
玻璃無底涵煙雨。
好將潤澤天下施，
沾溉寧論數千畝。

次蕪微明諸公韻三首

鏡中已失舊時容，
懶問春來白與紅。
君為花愁成獨醉，
餘醅何惜命鄰翁。

未許醅釀浪得香，
殿春時出一枝芳。
從他百卉隨風舞，
獨立晴天試艷粧。

黃雲看即變成秋春事餘寒得少留此去浣花猶遠在
誰人能為作遨頭

過孝義亭作詩寄歸代書

經夕離家行百里山椒一上一回頭此來頗快疑陰相
寄語妻兒勿過憂

登徐孺子亭

昔賢久矣埋黃土獨有清風翳環堵曾將一束奠生芻
今與遊人鬧歌舞

簡龔令望

乘興來尋老樹村
接談才祇叙寒溫
翻然掉臂凌風去
何似王猷不及門

南康道上

穿山深徑如行巷
拱道喬枝欲化龍
開闢從來年代遠
不知過盡幾人蹤

復聞杜鵑

憶到盱江聞子規
五更自在勸人歸
而今俄起尊鱸念

不為山禽說是非

宿洪氏南軒

馬乳龍鬚方壓架
玉簪羅蓋漸平堤
竭來頗釋塵勞念
况有清風入枕幃

懷烏山栢庭僧宗文

清風明月休論景
翠竹黃花不離禪
好箇趙州關捩子
陶潛欲辯已忘言

遣興

一身欲着自無處萬事不疑心始閒僕僕紅塵皆苦相
何時挾策過東山

贈朱少南別二首

外貌休尋餽座梨應知石裏蘊瓌竒從來善相書前史
為識英雄未遇時

朱君精到古人趣踏遍東南稱獨步祇今應詔非乏材
預煩拈出棟梁具

己亥出南康宮伯稱以詩贈行次韻三首

誰憐甲子混泥塗老鈍何能展壯圖方恨此行垂索去
辱君贈句當駢珠

丹楓攝攝掛晨霜笑指匡廬路許長且喜眼中無逐臭
自然心地發清香

君才端可用於時努力行將徹主知出處到頭皆分定
相期於道不須離